

欽
定
全
唐
文

欽定全唐文卷五百二十九目錄

顧況二

江西觀察宴度支張侍郎南亭花林序

宴韋庶子宅序

送朱拾遺序

陪江西李大夫東湖賦詩送宣武軍趙判官還使

序

送韋處士適東陽序

送張鳴謙適越序

送宣歙李衙推八郎使東都序

仙遊記

宋州刺史廳壁記

湖州刺史廳壁記

嘉興監記

華亭縣令延陵包公壁記

宛陵公署記

王氏廣陵散記

陰陽不測之謂神論

文論

如意輪畫讚

并序

玉筍山書堂石傘峯銘

釋祀篇

欽定全唐文卷五百二十九

顧況二

江西觀察宴度支張侍郎南亭花林序

右洞庭左彭蠡公所臨也先庚式武後甲徵文公所總也夫以清淨和平之德下施於民猶之不理旣當其樂不觀其華不在吐曜騰光自開自落而已欣戚之氣實棲其閒繡衣使者詞客張君相閣之賢從事于公疆理一曰均賦二曰省徭三曰主文能中質茲亭之樂其可節乎蓋取之明離麗君子健應之象

宴韋庶子宅序

昔洛下鄴中蘭亭峴首文雅之盛風流之事蓋一方耳今
席有芳樽庭有嘉木飲酒賦詩皆大國聖朝羣龍振鷺握
蘭佩玉者也在古其有陋乎在今其有榮乎終宴一夕寄
懷千載是時也暮春駘蕩孟夏恢台之交耳

送朱拾遺序

楚天暮秋衰草多霜我送朱兄置酒寒塘他方有遺名之
人語出世之事昔我大師居毗耶離方丈之室以虛空量
納諸羣有爲法而來難於酬對兄辯才者精於語默雪山

有草可生醞酬上賢不自豐故貧也上智不任數故樂也
言出以機在心爲咎故慎也和平發中金玉鏗鏘如秋水
之溢塘殊不知長松倚空遠鶴孤唳如兄也將刀畫水水
中不斷以道親人人何有別何山不可以爲家何水不可
以泛舟我送朱兄浮於亂流主明不在諫故諫臣在瀾漫
之遊

陪江西李大夫東湖賦詩送宣武軍趙判官還使

序

相國大司徒統戎於汴汴之介者有長鬣廣顙乘遽四方

交驩諸侯以利軍實我大夫待以加等問其所欲蓋相國
於其君義疎而後有誠誠存而後有別此敬相國而及子
其告復乃賦平字之什以寵之春秋之義凡君子之嘉一
善接一士皆欲有所用必相其宜而比之昔代之阿鄆燕
侵河上晏相之薦穰苴文能附眾武能威敵果却燕晉之
師

送韋處士適東陽序

珠玉在淵蘭在深林士不定方而處東陽佳地樓上隱侯
之八詠溪中康樂之贈答韋生翱翔若復故都會子放逐

相逢姑蔑之山所栽新詩婉而有意凡遊山水苦無卷軸
復無幽人攜手一何異飛鳥一翼行車隻輪眼界孤矣放
言自遣以貺處士乎哉

送張鳴謙適越序

晉司空十四代梁尚書左僕射纘五代孫曰鳴謙問行於
我我對曰迺祖蹈道隱黃鵠山乃先敦德隱朝陽山今子
洽聞繼修先好是一門而三隱矣臺仲之處也雲翔冥廓
亦復何礙又將嫁於四方余常適越東至剡南登天姥天
姥而西卽東陽太末姑蔑之地盤桓乎弋陽其山霞錦其

水紺碧其鳥好音其草芳葩奪人眼睛猶未麗也仙人城
在其上可以汰神可以建文可以棲闕一字子獨不見錯誅
而回樂乎感隙駟之末光事塗龜之修齡觀萬化之始終
道訓曰處其厚不處其薄丈夫之事予亦從此逝矣適人
之適孰與自適其適乎

送宣歙李衙推八郎使東都序

傳稱公侯子孫必大也天寶末安祿山反天子去蜀多士
奔吳爲人海帝命乃祖掌平春官介珪建侯統江表四十
餘郡雷行蟄動時况搖筆獲登龍門斷乎禮部訖乎吏部

陳謀沃論五十載感恩懷故今復得子蓋天贊予不奪前
好鋪耀光列慶鍾於後相如植文文以澡行行以宣業業
盛而罔有不安身安而後坦慮坦慮而後造適臻其平我
恢拓尋度不在職之小大祿之厚薄在蠱乃事也十連之
方九層之霄也使乎東洛盡族而來之謂何夫宣洞邑險
而棲盜古不偃兵今則不然革其土樂其民安其俗阜其
業客有乘堅策肥緩步闊視者張厥羽翰待風而振予見
子之達也雅之畧曰有華皇皇公所以寵大夫也

仙遊記

温州人李庭等大厯六年入山斫樹迷不知路逢見潞水
潞水者東越方言以挂泉爲潞中有人煙雞犬之候尋聲
渡水忽到一處約在甌閩之間云古莽然之墟有好田泉
竹果藥連棟架險三百餘家四面高山迴還深映有象耕
雁耘人甚知禮野鳥名鵠飛行似鶴人舍中唯祭得殺無
故不得殺之殺則地震有一老人爲眾所伏容貌甚和歲
收數百匹布以備寒暑乍見外人亦甚驚異問所從來袁
晁賊平未時政何若具以實告因曰願來就居得否云此
閒地窄不足以容爲致飲食申以主敬旣而辭行斫樹記

道還家及復前蹤羣山萬首不可尋省

宋州刺史廳壁記

商邱之地辰火之宿孟諸之湄闕伯所遷微子所封之國也厥貢絺紵厥篚織纊有蒙廬二門有睢渙二水炊骨易子隕星退鴟仲尼之伐樹子罕之棄甲皆此地焉梁孝王時四方遊士鄒生枚叟相如之徒朝夕晏處更唱迭和天寒水凍酒作詩滴是有文雅之臺清泠之地鴈鷺之所棲集園苑三百餘里制度法於長安漢末始置爲睢陽郡皇家大臣房梁公嘗牧此州今相國彭城劉公勛德有光亦

典此郡前破李靈曜後破李希烈爲梁開路而東方諸侯
并賦鹽泉所入歲約三千萬緡商在其外明年西朝天子
天子嘉之俾平水土乃拜司空俾敷五教乃拜司徒入參
大政出曜威武范陽君以智畧佐之由御史中丞行軍司
馬節度留後而領於是邦幕府得人於斯爲盛下車之日
無土不殖桑麥翳野舟艦織川城高以堅士選以飽詩所
謂誰謂宋遠誰謂河廣者矣自貞觀以來列名氏者以房
梁公爲首存乎東壁大厯之後繼聲躅者宜司徒公爲首
遂刊於座右貞元五年四月十九日記

湖州刺史廳壁記

江表大郡吳興爲一夏屬揚州秦屬會稽漢屬吳郡吳爲
吳興郡其野星紀其數具區其貢橘柚織縞茶紵其英靈
所誕山澤所通舟車所會物土所產雄於楚越雖臨淄之
富不若也其冠簪之盛漢晉以來敵天下三分之一其刺
史沿革不同或稱太守或稱內史或稱都督他州或否如
魯史晉乘侯牧一也其鴻名大德在晉則顧府君祕祕子
衆陸玩陸納謝安謝萬王羲之坦之獻之在宋則謝莊張
永緒彥回在齊則王僧虔在梁則柳惔張謏在陳則吳明

徹在隋則李德林國朝則周擇從令聞也顏魯公忠烈也
袁給事高讜正也劉員外全白文翰也洎于頓大夫作塘
貯水溉田三千頃今使君詞唐景皇帝七代之孫先公尚
書先公大夫奕葉之勛有功於民公實嗣之孔惺銘鼎天
下重器天王褒拔于公陟襄陽節度李公陟當道觀察統
諸道鹽鐵轉運二牧旣陟唯公盤桓鴻鵠不飛飛卽摩漢
其逋者復其危者安其憂者泰所謂善緝於是拓郢耰萊
就便除害政之餘力作消暑樓於南端復亭署於白蘋洲
聿興廢土光明敞豁湧出溪谷其舊記吏部李侍郎紆撰

其圖經竟陵陸鴻漸撰使君命況總兩家之說倣落晉宋
訖於我唐凡一百九十七人及厯代良二千石儀形畧也
鋪張屋壁設作存勸竦神告人春秋不朽之義也貞元十
有五年十二月哉生魄華陽山人顧況述

嘉興監記

正德利用阜財足食國之本也天寶末天下兵起乾元初
上司奏議宜以鹽鐵之職總以社稷之臣幹乎山海之利
以富人也淮海閩駱其監十焉嘉興爲首朝廷以是蠲貸
恒賦實乎大內大臣奉法爲事選人拔其賢幹昇於憲署

以宣原隰光華之寵趨其署者如好鳥之棲茂林相國劉
公嘗以大監小州不相若也故其職員不忝乎爵秩其刀
布必倍於租入渤海高君日倫世以勛烈緩步闊視胷襟
洞開中有方畧不循進級故一廷評於茲二紀傾酒定交
擲金市義不餌不仁之粟前使張侍郎滂王尚書緯總其
卜式宏羊之計遂有採山煮海之役十年六監興課特優
至是末期從百萬至三百萬鹽一作監人賈人各得其所故
端介之節風彩自高繼夫漕運波委陸溢此天下之利器
也可示人乎夫以步光莫耶切玉如泥剌鐘無聲不以一

割均其銛鈍君子以知人則哲無德不酬鴻飛九霄驥騁千里前祕書省著作佐郎顧況美使臣之得人貞元十七年歲在辛巳正月朔記

華亭縣令延陵包公壁記

陶氏之隱誥云張李二君勤行仁義異代同德慶鍾包君鮑靚通靈之士秦有包邱漢有包咸世爲學官隨晉南渡今爲延陵人也隋書儒林傳包愷包愉兄弟皆治漢書從子弟千餘人樹碑紀德惟皇六葉鴻臚宣力於王室著作垂名於當代起居祭酒聲隱都野與翰林供奉晁析其流

派君辟秀才以文字自附嘗夢入冥府決時而蘇根於修短有開之兆言地下之法峻於人閒頗符干寶搜神之事隨難奉天重圍暗解上撫其背而春官亦以賓禮待之及爲華亭有闢田增戶均賦愛人之政語曰千室之邑百乘之家由也可使治其賦而君實有之舊章壁記記其官敘野史之流也平原之谷水崑山鱸魚蓴菜海錯陸產彼何人而不知今記其異庶有補於化耳

宛陵公署記

博陵崔公端憲臺出九江涉吳換號三牧作又仁聲上騰

上褒之以宣歙等州團練觀察採石軍使內棲茂行外傳
純德德鋪生人人受賜所部無事緝乎井屋高棟大廡
樓傳高亭署以崇牙虔君命也畧五千架圯墁赭堊燭乎
一川竹釘木屑皆適所用前鎮未之有也其辟一士未嘗
不當其任其裁一簡未嘗不以憂人爲心兵馬使南陽張
伯陽承公指揮應接不暇廣而不費華而中儉堡有嚴柝
封有巨防巢洞之寇化爲平民銅官戰馬牛渚姑熟之隘
寵波絡谷莫不帖焉夫宣戶五十萬一戶二丁不待募於
旁郡而宣男之半已五十萬矣蹠勁弩耀雄戟吞敵如脯

戎心不啟其或有啟戎心備銳而襲之淮海之援過賓之
寵亦所以補凡例也庚辰年正月下旬日前祕書著作郎
顧況記

王氏廣陵散記

眾樂琴之臣妾也廣陵散曲之師長也琅邪王淹兄女未
笄忽彈此曲不從地出不從天降如有宗師存焉曲有日
宮散月宮散歸雲引華嶽引意者虛寂之中有宰察之神
司其妙有以授王女於戲天地鄙恡而絕神明倜儻而授
中散沒而王女生一作傳其閒寂寥五六百年先王作樂殷

薦上帝有不得而聞者鼓鐘時動敢告於太師

陰陽不測之謂神論

皇帝建立甲子考定星厯於是有天地神人之官少昊既
衰神人雜擾顓命羲和以司天地三苗九黎不復亂逆周
室既壞君不告朔漢道隆興方定餘閏世時昭昧君平季
主張衡索統陳訓韓友卜珣京房管輅郭璞干寶樂房班
固云陰陽多拘忌以爲無益嗟乎古論陰陽以和神人以
順風雨以播稼穡以除災害後之學者但張恢譎不自戒
慎不固親疎之道不精逆順之理不達性命之分而裁衣

拜官沐浴翦爪徵於厯日豈不悖哉左道亂政先王無赦
往見術者序卜筮之書及諸家祕訣七曜九宮六壬三五
復返十精飛鳥天目地耳計神漢厯以天赦母倉爲吉朔
厯以雲漢密莫爲吉各生異氣天竺律法復與大衍有差
吾誰歸矣又以姓配音以音配墓以墓配殺此莊惠以荒
唐舛駁之論且黃帝二十五子得其姓者十三人或以地
爲姓或以官爲姓或以謚爲姓或以王父字爲姓士會在
虞爲陶唐氏在夏爲御龍氏在商爲豕韋氏在周爲唐杜
在晉爲范宣子在隨爲隨武子在秦爲劉氏女嫁樂瓘爲

祁氏焉此一人之身改姓三改氏五范蠡在陶爲朱公在
齊爲鴟夷子范雎稱張祿先生第五倫王伯齊鮑永本姓
包京房本姓李張良之後爲留氏田橫之後爲王氏姓有
兩字三字四字五字孰先孰後孰是孰非長平同坑南陽
同封時日或同吉凶或異行年本命其事安在周時玉尺
漢代黃鐘河汾鼎氣沈埋自久不可仰則其道多門行則
無盡不如也是故文字非上學上學神聽原其性也集解
非宗師宗師授受扶於理也端心靜一神明將至黃帝遺
元珠象罔得之漢主心動獲貫高襄子心動得豫讓披髮

祭野野人之遺魂非有陰陽算術之功涉津無涯安濟所
屈釋氏五蔭輪爲四生或居人中以爲鬼神唯代有佛法
獨能究竟白雲依山出入自得飛鳥以滅虛空不礙清明
在躬志氣如神陰陽不測唯佛而已

文論

周語之畧曰孝敬忠信仁義智勇敢惠讓皆文也天有六
氣地有五行此十一者經緯天地叶和神人名之爲文其
實行也文顧行行顧文文行相顧謂之君子之文爲龍爲
光上古云言之無文行之不遠堯之爲君聰明文思文王

既沒文不在茲乎文王之代草木鳥獸皆樂文王之沼曰
靈沼文王之臺曰靈臺虞芮不識文王入文王里所見耕
者讓畔行者讓路班白不提挈自相謂曰吾黨之小子不
可治於君子之庭詩人美之云文王斷虞芮之訟晉文與
楚子戰而霸諡曰文公夫以伏羲之文造書契黃帝之文
垂衣裳重華之文除四凶舉八元周公之文布法於象魏
夫子之文木鐸徇路此其所以理文也伊尹之文放太甲
霍光之文廢昌邑呂尚之文殺華士穰苴之文斬莊賈毛
遂之文定楚從蘭相如之文奪趙璧西門豹之文引漳水

沈女巫建安正始洛下鄴中吟咏風月此其所以亂文也
夫以文求士十致八九理亂由之君臣則之舜堯禹湯有
文桀紂幽厲無文太顛閔天有文飛廉惡來無文昔霍去
病辭第曰匈奴未滅無以家爲於國如此不得謂之無文
范蔚宗著後漢書其妻不勝珠翠其母唯薪樵一廚於家
如此不得謂之有文且夫日月麗乎天草木麗乎地風雅
亦麗於是故不可廢廢文則廢天莫可法也廢天則廢
地莫可理也廢地則廢人莫可象也郁郁乎文哉法天理
地象人者也周易贊乾曰大哉乾元萬物資始贊坤曰至

哉坤元萬物資生唯大者配乾至者配坤幽者蹟鬼神明者蹟禮樂不失於正謂之爲文

如意輪畫讚

并序

金剛記寶頂記花三昧頂輪三昧等經云蘇迷盧南有俱露州州西南面夷羅國俱尸那城南去八千由旬至於雪山茲山純白厥草肥膩高六十由旬周二千二百拔提河在左長仙園在右清熱惱海在南跋陀海在北善法堂在上瞽龍洞在下日月迴泊在俱物羅奢半空脇是龍居此洞地堅牢恒沙諸佛成道諸所如意輪於此山閒佛言毗

勒那鉢奢無忘無心是離那奢多性本空是祇彌物都思
觀身實相是悉那鉢多彌觀佛亦是又問何者是陀羅
尼相貌佛言空觀心無爲心廣大心常住心不變異心無
無心無無心是恒沙諸佛諸佛摩頂密語也言在身中恐
人輕教諸佛不許內外雙立非賢不轉如意輪本名少足
少法也其法滿足謂之少足與夫圓滿滿願廣大大悲等
慈慈觀智網寶手千手眼得無畏清淨光除業道破諸暗
無障礙無等等與夫普明慈明千光王佛十億之號猶爲
至畧淨華宿王智佛時所立名記普門願行此應見聞隨

方說法法同而名異固云賢劫中千佛助化此爲一佛二尊不並願爲侍者寶德佛時名庶命仙人定光佛時名安忍童子請願之後名如意輪大悲菩薩是愚於蔭界畫彼真形法華經云一華獻畫像漸見無量佛讚曰

同體如來所說總持法內外雙建爲普門大悲廣運無邊際已渡塵沙生滅海圓滿滿足各如意破除業暗發光彩

玉笥山書堂石傘峯銘

亭亭石傘有物有名如蓋若傾如芝一莖又如搖袂拂著上清俯踏不平仰捫雲行石傘山東山銜日宮石傘山西

山銜月宮南巒北阜首出屹雄千里在掌五更見日我來
豫疾毛豎汗出齊侯賁趾以隱爲榮往往洞穴聞金奏聲
橡栗裏險猿猴相爭喬木千尋凡人幾生芳樹冽泉懜夫
惶惚螺旋錦沓鶴鳴山空杳兮神乎不宰其功

釋祀篇

龍在甲寅永嘉大水損鹽田溫人曰雨潦不止請陳牲豆
備嘉樂祀海龍揀辰告廟拜如常度況曰不可夫天雨若
其冥數也天苟不已龍曷能已先王經物祀典有常今海
爲川長龍爲介長不應祀而祀之非禮也動不合禮祀猶

不典頽典毀教臯之大者也夫溫夷越雜居役斂煩多皆有遠志宜昭賞刑謹吏則勤而不懈猶恐罔從而淫神貪福海盜亦將亂溫人其不免乎昔三王祭川先河後海而諸侯祭其疆季氏旅於梁甫孔子譏之今海廟在溫溫人其可祭乎神禍慢社虔醜回嘉直者也驅迫窮氓索罄南邑罔其神以縱毋乃不可乎三代之祈甘雨也則納稷契其除水害也則流共工其愛人勝祀翼日雨止鹽人復本泉貨充府

欽定全唐文卷五百三十目錄

顧況 三

衢州開元觀碑

書衢州開元觀碑後

虎邱西寺經藏碑

蘇州乾元寺碑

廣陵白沙大雲寺碑

饒州刺史趙郡李府君墓誌銘

檢校尚書左僕射同中書門下平章事上柱國晉

金史卷之二十一
國公贈太傅韓公行狀

祭裴尚書文

祭李員外文

祭陸端公文

欽定全唐文卷五百三十

顧況 三

衢州開元觀碑

王太上也謂之三清淵神靈也謂之三洞洞之法金璫玉佩之書玉馬之券迴車畢道天誥也負石填河師誓也得之者上騰九天失之者下釁十祖故曰萬劫祕而五千文行蕭武好佛法道士挑攪釋藏徒聊順帝旨強說爲大教佛經故論者短之多稱道家唯有老子兩卷井蛙不知尾閭也大哉玉皇上極金闕青童紫微扶桑之君仲侯左靈

東華之君人雖位在上清而猶臣妾玉皇太上已下如陪
臣焉凡三十六天三十六洞地道下通華陽林屋傍通龍
邱九巖其土神秀厥生道奧徐先生名含真中書侍郎安
貞之族子也傳八景之真文握九光之靈符隸乎此觀初
棟宇壇墀惟彼瓦礫鬱爲草莽先生之功林堂象設始吐
光彩蕭寥同映養屯茹氣蹈火吞刀之士不可呼而來夫
道可不遇文復何昌銘曰

天地未生聖人未作陰陽坎北日月磅礴道隱乎先氣流
形博乃播羣法靈神沃若奔景無天迴元豁落其帝作玉

府以般靈居四輔之目三清之書不得其人曠劫祕諸臣
拜稽顙以度寶魄之明浩輿

其二

書衢州開元觀碑後

況往嘗盜開靈書罰露天誥免冠自懲慮不塞咎戾矢其
文以自贖蓋欲鋪簡神明非爲道士所發自貞元辛未歲
九月哉生明余窮愁幽憤思以自適吟咏道篇以攄煩襟
時長安尉杜陵史鎬在焉爲余搦管揮灑後漢神仙之士
王次仲者善爲此書余今日見史侯如漢世矣

虎邱西寺經藏碑

闔閭之葬海浦也水銀爲溟渤黃金爲鳬雁精氣爲白虎
是名虎邱東晉王珣王珉捨山造寺生公忍死待西國經
來之所也山中塔廟叔父有功叔諱七覺字惟舊容相端
靜神龍初八歲剃度萬言一覽學際天人嘗以唵嚩禪林
萬法之母法從數起乃讀外書小餘大餘以爲證據維摩
所謂通達善道法華所謂通達大智况受經於叔父根鈍
智短曾不得乎少分至德三年示終本山付囑門人澹交
曰此山法事莫不圓對而經藏猶闕澹交僧瑤俗姓何廬
江次宗其胄奉佛不敢廢師之命自至德貞元龍在戊寅

紹建方畢瞿曇教迹不捨有表不住無表般若用中壇攝
其六頂攝其四譬如無根安得有華故覺華長者得定光
如來授記鹿仙長者得釋迦如來授記寶手菩薩得空王
如來授記皆因造藏而得作佛從虛空藏流出一切藏一
切藏流出四大藏四大藏一億大藏四億小藏圍繞湧出
狀如蓮花灌於四藏流出十二藏從十二藏分爲三藏一
聲聞藏二菩薩藏三真如性海藏海水可量虛空不可量
虛空可量菩薩摩訶薩成就眾生變化隨感不可量菩薩
摩訶薩修行地位有分劑故故可量諸佛真如性海無分

劑故故不可量灌於三藏流出八萬四千藏修多羅藏摩訶藏爲上首於是有法藏寶藏甚深微密藏妙花光雲等藏藏無盡在色究竟天衆生福薄不得瞻覩謨呼羅摩海醯首羅大自在神天樹雲音日輪速疾執金剛神淨光光香雲最上光嚴身衆神清淨華髻栴檀樹光足行神雷音幢相雨花妙眼道場神淨花普照無等光燄主空神永斷迷惑普遊淨空主方神示現宮殿樂勝莊嚴主晝神普得淨光諸根嘗喜平等護音寂靜海音主夜神其摩竭提國有金剛藏中有摩尼瑤王變現自在雨無盡瑤嚴好花是

諸菩薩演說如來廣大境界慈目瑤髻發生喜樂可愛樂
正念天王十方海中一切瑤王吐雲彌覆流出教綱其佛
號法水覺空如來嚴持器仗夜叉王力壞高山夜叉王毘
樓博叉嚙口海光龍王等甚可怖畏鳩槃荼王美目端嚴
鳩槃荼王日光天子月光天子星宿王天子威德光明天
子各各恒沙恒沙眷屬相與掌護其南海楞伽山下娑竭
羅龍宮其光明藏大地劫盡諸方等諸經納於龍宮其瞻
部洲大藏六萬卷中藏六千卷小藏四千卷大悉地有空
有不空廣畧平等譬如萬法出一塵中千論百疏又如一

塵流出如帝釋宮殿因陀羅網一珠映八千億珠法界義
中法身法性百佛世界細一毛端析一毛端成微塵數世
界一一世界法身演無量百千萬億諸佛法藏是身爲陀
羅尼藏湧法海藏衆法瑤藏舍乘數藏花頂衆藏密耶護
藏言頓顯也此皆奢摩他毘鉢舍那定惠之力觀見如來
等藏藏依識攝有舍藏理發於心而形於藏內外俱朗不
其然乎斯文淳一非敢戲論光佛相好贊佛功德從佛知
見中來頌曰

雪山紺宮等虛空耶叔父付囑澹交續耶妙華光雲香普

熏耶娑竭所指摩醯護耶喝刺呼噓歸命護耶

蘇州乾元寺碑

五蘊十二入十八界此上三科能包萬法因緣生爲有無
自性爲空空有融一卽中道義雖石船渡海蚊背負山不
爲希有事僧法珣與和合衆法藏等造乾元寺者晉高士
戴逵子禺之宅也乾元初節度使鄭昊之奏立觀察李涵
李道昌皆有力大臣求無上道以心無所願無邊受者實
得施者實與雖空不敗有爲有滅無爲無滅無爲有爲之
體有爲無爲之用無生無滅無相無名無相法無言語說

法以無言語說故有相大乘有觀法門無相大乘無觀法
門於法有所得有相大乘義於法無所得無相大乘義所
得無所得俱真一乘之義事也爲妙因果譬如種子依地
而生又如大地能荷羣有虛空之體大於天地天地有盡
虛空無盡如來之體大於虛空光明虛覺圓寂萬億故於
無住本建乎諸法不動真際恒沙煩惱莫不斷除魚吞鈎
虎落穽蛾拂火此眾生自取其毒道本平坦樹本清涼佛
在摩竭提國城等正覺諸弟子棲乎茂林藉彼祥草厥後
因時設教猶著弊衣行次乞食及往忉利省摩耶夫人優

填王鑄金刻木始用膠漆泥布佛有像自此始也與佛在
時功德無異於是給孤長者造祇園精舍末由底迦造龍
宮精舍竺乾法蘭造洛陽白馬寺佛圖澄造鄴中九百七
十三寺釋道安造襄陽一十五寺遠法師造廬山東林西
林寺度法師造攝山棲霞寺杯渡法師造南陵隱靜寺傅
大士造東陽雙林寺思大師造衡陽南嶽寺智者大師造
天台國清玉泉寺三十五寺畧也涅槃無前無後般若無
新無舊法珣上人重舊德不輕新學門人清瑛請况於經
藏中抄佛心說永示無極文曰

金光明經卷第二
三十一
倬哉迷盧宏亘大千百億日月藕絲貫穿蚊背負之飛登
梵天塵勞爲海般若爲船截生死流是曰希有大哉乾元
實則不朽和眾雲臻珣爲稱首佛告善來寶坊崇哉法雨
灑埃慈雲徘徊

廣陵白沙大雲寺碑

地輪依水水輪依火火輪依風風輪依虛空虛空無所依
佛體也變佛體爲金色界地輪是也金色界中有香水海
水輪是也香水海中有光明藏火輪是也復有寶林香花
瀾漫周徧佛土風輪是也上至香積下至金色一光明藏

依報正報之因歟有智爲情界無智爲器界佛土爲性界
法身報身應變之身一也天親以應化非真佛亦非說法
者其華嚴則不然諸佛同身流入毘盧遮那智藏之海人
有血脈地有溪關滄島之脅有白沙之墟焉天塹在南蜀
岡在北敦彼廣斥勾攘五材擣刺元精猛虎蹲路騰蛇跋
水氣母毒形火爐胚物之意惣持相土曰牛欄河灘畔堪
造漫吒羅非人乃秋天寶末長安僧綯避虜東土畫爲像
宮以配梵帝皇猷允塞景福爰集善來若干商主若干與
其眷屬爭欲奮迅爰雲構版插定中丕赫微綯之功人其

捨諸於戲古稅甚薄人猶告困夫絢不柄刑賞不驅其人
蓋以天子孝理昭明並受其佑霜露怵惕蓼莪罔極申以
上報諛儒經之闕聞此名教君子肝腦而塗地者也不然
其孰能與於此乎所作旣成推山斡坎金翅吞龍之勢徹
乎上王磅礴乎夜摩胷開掌坦基布箭直廓乎其崇之哉
洎夫檄師陶師車匿乾陟方等百一嚴身之具華儉適中
滿而不缺三草二木俱霑一雨昔北山之翁天帝命操蛇
之神以遂其志是知慈善根力軍吒胷索口唵火皆瞥電
春雷張曜威恒保寧刹土見易底迦一時生晦魔軍法將

不可以較乎勝負吹螺擊鼓歌唄讚歎旋和之眾莫不圓
通信乎剎膩停酸修羅窟迹菩薩鏡生死海爲大涅槃大
法現前了無塵瞠凡有作有證名有相大乘無作無證名
無相大乘體相既融一真味也涉入無閼因中說果果中
說因此文殊道引之智殺羊有角能破金剛不破如如之
相我於觀照權實皆如如從心上變起離心無物離物無
心心因物因迷盧不動有若靈辨禪師者大照大師之上
照足如優曇花綱首良制利見如蒼蒿花絢上人者根器
清淨如拘物頭花芬多利花聿來求我分別三諦不有歐

和之志悉地之德焉難乎決擇然則盟陁喃散施有情之
義磁石攝鐵不攝鴻毛相應故作針則沈作鉢則浮隨緣
故獸齧堅骨魚食碎砂砂骨游鋪託胎佛也明佛性故與
夫有不染塵空不斷相非空有故若有去來若無去來無
去來故若有方所若無方所故佛與眾生數無增減無增
減故補特迦羅由來則佛前佛後同名同號乃至不同一
一微塵之數微塵數佛各坐蓮臺展臂指塵皆當此說且
修多羅藏八萬在婆竭羅龍王宮中以龍樹之聰利受持
不盡海惠盡焉曾不得失夫少分或以其言河漢詎知我

生一一生陰陽也不測之外更有神速之如此乎是以聖人神道設教大哉神乎若在其上若在其下羣玉藏書之府比夫現量春秋敘二百餘年方彼曠劫百千萬億那因他其數畧也法從數起從一剎那至一洛剎從一洛剎至一俱祇從一俱祇至一僧祇從一僧祇至一高出從一高出至不可轉無邊無碍無央無極重重成住壞空空不相凌滅其相去也不亦遼乎假使生肇融睿伊臯稷契共佐唐虞我知不相若也老聃曰竺乾國有古先生西過流沙尋師之旨孔子對商太宰曰三五非聖西方之人蕩蕩焉

無得而稱又曰聖人吾不得而見之矣日月無燭無不燭
聖人無見無不見般若無知而無不知周紀有之昭王二
十四年甲寅天地震動江河泛溢王問太史蘇由此何祥
也對曰聖人生於西方穆王三十三年壬申天地震動江
河泛溢王問太史扈多此何祥也對曰聖人滅於西方示
有生滅實無生滅向使無生之法格乎戰國戰國得之秦
不坑儒趙不坑卒小國事大國大國不征小國含哺鼓腹
無爲之法化也雖有大夢然後大覺塵勞性空空有常寂
分改遷易無非法身而大雄法寶五迦葉不得當乎付囑

必也當乎不論前後此瞿曇所以贊佛法也文曰

佛日之曙兮照乎東方大雄說法兮海印發光獨立三界
兮橫吞八荒江沙漫漫兮寺壓其陽撼谷幹波兮氣盤中
央

饒州刺史趙郡李府君墓誌銘

粵攷春秋敘事之實趙郡東祖源流甚長衛州刺史嘉祚
曾孫榮州刺史璿孫贈尚書郎銛子諱端字公表官由臺
省興元少尹少府監出泉饒二州刺史參佐不書畧也貞
元八年秋七月終於郡署年六十一明年八月庚申窆於

鳳山之東原嗚呼神明無質君子能通其意以爲教本仲
尼闡教微言七十子揚大義去聖雖遠其七十子之季孟
乎至於饒禮將驅俗經以道俗饒之人始有講睦之聲上
員不弔殲我渠喆昔桐鄉嗇夫猶葬桐鄉桐鄉之人皆祠
之今饒之葬如此嗚呼列章載云精神天之久骸骨地之
久此言骸骨滅其精神不滅者何從心上變起而生展促
常讀眾聖之書上於釋典如川及海之無翻流蘊廬久處
奮迅泥滓宜諸精爽黜陟幽明亦由是也夫人贊皇郡清
河崔氏從其子拭盡力哀敬記石陵谷永質天壤銘曰

蘭桂有叢以薰其風邯鄲舊氏厥祖惟東吁嗟府君其命
不融精神本天不在乎地舊國飛魂新塋掩隧逝不可止
哀何不旣

檢校尚書左僕射同中書門下平章事上柱國晉
國公贈太傅韓公行狀

曾祖符皇朝潭陽郡太守祖大智皇朝河南府士曹參軍
贈吏部郎中父休皇朝銀青光祿大夫太子少保贈司空
諡文忠公京兆府萬年縣洪固鄉胄貴里韓滉年六十五
公繼代生賢左右王室鄭武之賢韋平之美開元中解褐

授右威衛騎曹參軍丁文忠憂服闋授京兆府同官縣主簿又丁內憂孝貫神明服除授太子通事舍人肅宗在靈武授監察御史兼北海郡司馬充北海節度判官道阻未行除通州刺史尋充山南西道採訪使判官時宰醜正除彭王府諮議詔除殿中侍御史累遷祠部考功吏部三員外郎判南曹尋遷吏部郎中給事中兵部選事有盜殺富平令倚爲禁兵特詔釋之密疏聞狀遂伏其罪遷尚書左丞知吏部選事有擁馬陳詞造階抗議曾不再煩主吏重閱簿書片言遣之莫不心服拜戶部侍郎判度支管諸道

青苗稅戶屬國計空耗上難其人服勤九年出利百倍左
藏之錢至七百萬貫大倉之粟至數百萬斛其邊儲或五
六萬或十餘萬有附大臣閒於先帝者引劉向羊頭山黍
云權量久差公曰山之南北地之肥瘠禾黍不同會內藏
有隋朝銅斛果不差異安邑解二縣鹽池比歲水漲甚於
往年有漫生紅鹽之瑞詔諫議大夫檢覆并致祭祠宇號
寶應靈慶池宣付史館拜太常卿出爲晉州刺史拜蘇州
刺史充浙江東西都團練觀察處置使尋加銀青光祿大
夫改檢校禮部尚書兼御史大夫潤州刺史鎮海軍節度

使依前充浙江東西觀察使令行風動無敢犯者自信安
洪光東陽捍狼山僧惟曉等結連數郡熒惑愚眊破其巢
窟伏戎自殪山越一清管郡十五戶百萬里尹亭長書佐
小史令丞牧守通數萬人自公區處不朽之作乘輿播越
畿甸路斷公日遣一使閒道齎帛表詣行在諸道未知行
在營將士無不引還唯公所遣兵鎮河南衝要堅守不退
兵馬使董晏將三千人鎮徐州部將沈清等頗違軍禁公
遣一介齎牒轅門答晏二十沈清等六十八人悉按軍令
徐方既定轉檢校吏部尚書加金紫光祿大夫封昌黎公

改封南陽天子幸梁川巴山道命判官何士幹領健步七
百負絞練十萬疋上獻天子六軍從官扈蹕千里時屬維
夏未頒春衣表至行在眾情大悅公又命從事裴樞李倫
徵巡內兵甲麾下將士合三萬人請翊衛鑾輿收復京邑
上深嘉歎特加檢校尚書右僕射李希烈眾軍東下志吞
淮濟公卽日遣兵馬使王栖霞李長榮柏良器以勁卒萬
人泝流千里倍程救援纔及睢陽賊已陷襄邑攻寧陵栖
曜等突圍乘城矢中元惡凶徒懾遁不敢東顧淮南初喪
節度使大將王昭帶甲數千夜犯城府或出權計者云江

南兵至召兵遂散殺戮甚多士卒驕矜爭邀厚賞率居人
商旅五十萬緡符牒已行人情恟恟公卽日遣都虞候李
栖華謂兵馬使張瑗等曰收復上都六軍未賞節度薨歿
豈名爲功賦斂擅興何人造意諸將引過橫調立停及大
駕還都進封郡公時希烈盡銳攻陳州公命諸將與宣武
軍合勢破賊數萬人關中初復公以爲國無年儲何禦荒
儉陳圍已解汴路卽通抗表請獻軍糧二十萬斛從本道
直至渭橋公命判官元友直草創運務部勒趨程時河中
阻兵堅城未拔關河蝗旱軍食不足船至垣曲王師大振

拜檢校尚書左僕射同中書門下平章事加本道度支營田充江淮轉運等使連歲蝗災仰在轉運公自晨及暮立於江皋發四十七萬斛舳艫所至近遠慰安貞元元年十一月十一日制曰江淮轉運使某官某勵精勤職夙夜在公厥有成績可進封國公初封鄭改封晉前後河南用兵解寧陵睢陽之圍全彭城要害之地朝廷議勲特賜一子六品正員官又其軍鎮營宇舟船鞍馬甲仗旗鼓羽革丹漆牛羊六畜難乎校算應緣兩稅唯有一勝人爭及限吏不到門今江南縑帛勝於譙宋二年冬十一月朝覲上深

禮重委以大計加度支諸道鹽鐵轉運等使待空巖穴方
歸田里主恩彌深初願遂違顧謂其族爲當湮肝膽身塗
草莽上答乾坤時屬西北用兵倉庫空竭公和糴五十萬
斛無敢奪期米價遂賤防秋士馬儲糗更無闕自公當漕
運初年四十七萬二年七十萬末年一百萬尚結贊普使
六蕃抗言逆順之理夷虜感動肝膽楚越張權者不敢惕
息盜位者退而思過貞元三年二月二十五日薨於昌化
里私第春秋六十有五皇帝震悼輟朝三日制曰故某官
某應運而生弼諧於我道符兩曜德冠八元以武綏邊以

文經國方期難老式作宗臣孰謂不融盡瘁而沒雖鄭亡

子產衛失柳莊慤悼之懷豈過於此過時謂

三字疑

撫牀增

慟當哀興嗟厚申往祿之恩載榮優贈之禮可贈太傅前
後賻贈布一千疋米粟五百石錢四百萬喪事供官公踐
歷四朝歲逾五紀炎不執扇晝不伏枕疾無杖屨居必矜
莊自同官主簿制一裘褐直爲宰相古人無食粟之馬衣
帛之妾更爽之居不足多矣以沙門一行得聖人之道特
寫形影仰如宗師瘠在春秋精於繫象賦春秋七章著通
例六卷并章奏詞畧十餘萬言豁如恒星敦故舊重然諾

好古博雅能書善畫夫議大勲者則不書小善舉大德者則畧其細事故不殫論矣公有子弟聞斯行諸不敢墜失况以賓客從事日久泣慕清塵謹狀貞元三年閏五月十八日故金紫光祿大夫檢校尚書左僕射同中書門下平章事晉國公韓公故吏將仕郎前大理寺司直顧況謹上尚書考功伏以柱石元臣勲績光茂孝則先意承志忠則知無不爲武能禁暴文以經國翊贊聖明懋建和平沃心造膝簡乎上長策宏規振乎外奄從流運恩軫睿慈今月日若馳松楸將樹易名之典請舉舊章謹上

祭裴尚書文

嗚呼天禍甌邦尚書告薨哀哀甌民罷市輟春何時復覩
盛德形容伏惟尊靈惠和溫恭識洞元龜文掩雕龍天生
大賢叶贊時雍至人厭世寥廓爲友精神不留天地長久
谷神不死是曰長生伏料尚書上賓天庭悲號者何在物
之情惟公據道夙負重名爰自成才厯拜通榮五十餘年
侍奉承明隨難西蜀拔身定傾有唐中興累踐銓衡朝廷
擬公三老五更上憂方隅出典百城淺學自私掩善揚鄙
我我尚書近仁不已昔在春官先我大國鬱興多士周易

有云黃中通理其斯謂乎自我江潭於今多秩處順保終
洗然自逸上官命况糴鹽蛟室奄居黃泉不見白日顧惟
陋賤時承周密感德懷仁何時終畢神儀超忽靈駕徘徊
敢申薄禮以表深哀伏惟尚饗

祭李員外文

古之哲人銅鞮介山柳下臧文先生企之密邇四鄰逢時
不昌與世遘迍先生淵然金碧無塵通識殊倫精義造神
退居江潭節貫松筠皎皎先生蘭言玉聲詞林搖落天地
空春宜與太一上爲帝賓若商傳說例列星辰天將以公

經濟生人生人不幸天喪斯文斯文既喪嗚呼郢匠先生
逝矣何人知況知何人升堂誘進造次無爲樞機必慎
跡暢高節心融密印詞不能豁其曾襟故春容於絕韻而
京口歸魂毘陵旅櫬可勝悲哉心喪何自身役炎洲先生
大歸赴哭無由古之達者以生爲浮先生徂征與化同遊
四節不留物無長在寂寂賓階人遷事改陶潛自祭管輅
知終本師瞿曇了達虛空初命少子昏冠先禮兆發深衷
聖朝悼歎儻遂追崇忝友季茂休戚畧同北望丹徒山險
萬重文非尺牘鬱塞盈曾想公形容昭况肅恭尚饗

祭陸端公文

維大厯八年正月朔同鄉顧況於永嘉發使具簞蔬野酌
敬祭陸三十二兄端公之靈嗚呼接席之歡俄成奠酒殊
鄉少別杳忽於今牽拘南役遠哭如淚兄秉德居厚植靈
超茂天和發外虛白自內特挺孤操與物去害惟昔二京
羣盜縱橫出入十年天下交兵越盜寇吳殺人燒城國危
如此公乃請行我之行焉無往不平擁陣陵陽迴戈歛右
江南山洞畧盡遺醜巨敵先摧羣降獨受兄之令弟况之
良友感激風雲留連詩酒昔魏有人子方段干兄之所在

人心獲安賢者讓平惟患是急兄之忠勇人莫能及燕將
泣書齊師復邑迹爲功著名因義立爲帝念功君門遂通
臺閣生風乃憶江東高臨山中有書滿屋與人共讀有粟
如雲與人共分破富爲貧好事日聞靄靄牛潭我我囊嶺
開流架迴倒寫烟景今日淒涼林空夜永人或言吉凶
無門我命由我以兄之才何適不可寧知一旦忽鍾茲禍
鴻翔千仞自茲而墮嗚呼哀哉伏惟尚饗